



PLAINTÉ DE M<sup>r</sup> PIERRE DV VERDIER,

Abbé de Saint Martial de Limoges:

page 71  
a

*Contre les violentes procédures faites par le Sieur d'Argenson, Intendant de la Justice en Limousin, à la requeste du Sieur Brisacier  
Commis de Monsieur Deffiat, sous le nom des Chanoines  
de ladite Eglise de Saint Martial.*

A Messieurs du Clergé de France.



ESSIEURS,

C'EST vne sentence de Saint Paul, laquelle a esté presque approuvée de tout le monde, mais neantmoins bien diuersement expliquée, à sçauoir, Que ceux qui desirent des Eueschez & des Prelatures, ont vn dessein extrêmement loüable. Il est pourtant veritable qu'au sens du Saint Apostre; & selon le cours du temps auquel il viuoit, l'administration des Prelatures estoit l'argument d'une eminente & singuliere vertu, bien esloignée de nos ambitions & auarices, veu qu'il n'y auoit lors pour la satisfaction des Prelats, que des peines & des ignominies à essuyer: Et c'est pourquoy peut estre ces belles dignitez estoient souuentefois refusées tant par la modestie de ceux qui n'estimoient pas auoir les espaules assez fortes pour les deseruir, que par la prudence des autres qui n'auoient pas assez d'haleine & de courage pour aspirer à la couronne du martyre. Mais maintenant que le regne de l'Eglise est affermy dans vne solide & profonde paix, & que les Ecclesiastiques sont à l'abry de routes sortes de perils, ils ne les vont rechercher delà les mers & les montaignes; maintenant que les Prelatures sont non seulement

A





des noms de dignité, mais des titres de richesses & de reuenu, il faut aduouër que iamais les Benefices ne furent en si grande recommandation ny tant desiréz qu'ils sont à present. Les gens de bien, de bonne naissance, de litterature & de probité ont fujet de les desirer, parce que c'est le port & la retraite honorable de leurs soins & de leurs veilles, & d'où ils peuuent tendre la main à ceux qui ont courage de bien faire. Les gens du monde pareillement les recherchent par vne prudence du siecle pour l'auancement & le support de leurs familles, peu soucieux au reste du seruice de Dieu, ny de l'honneur du Roy, dont ils abusent; ny de l'edification du public, qui est ordinairement le dernier de leurs soins.

Messire Pierre du Verdier Abbé de S. Martial de Limoges, fessant deuoué dès sa ieunesse à la profession Ecclesiastique, ayant adressé à cette fin toutes ses intentions & ses estudes, apres auoir rendu des preuues publiques de sa suffisance par les sages & eloquentes predications, fut sur la nomination du defunct Roy pourueu de cette Abbaye de sainct Martial il y a trente deux ans passez, en laquelle dignité s'estant voulu monstrier digne du bien-fait & du choix de ce grand Prince, il s'efforça d'autant plus à jetter des esclats de vertu, & faire fructifier le talent que Dieu luy auoit mis entre les mains. Ce fut ce qui luy concilia l'amitié des plus grands de sa prouince: mais ce fut aussi ce grand lustre qui esbloüit & irrita ses égaux & ses concitoyens. Ce n'est pas Hierusalem toute seule qui massacre ses Prophetes, & ceux qui sont enuoyez pour son salut & sa plus grande gloire. La ville d'Athenes, le domicile de la science & de la sagesse humaine, a banny, a meurtry les Aristides & les Socrates. Et de nos iours ceux de la Republique de Rhaguse ont fait passer leur ialousie en article d'ordonnance, & de loy fondamentale d'Estat, en prohibant que nul de leur Republique ne fust promu en la dignité de leur Euesque, de peur d'estre obligez de respect & de veneration enuers vn de leurs compatriotes. Mais ces apprehensions & ces enuies sont peut estre supportables dans les estats populaires, où les seuls noms de superiorité & de preeminence leurs sont suspects. Mais en France où la Monarchie est



3

establie depuis tant de siecles, où l'on dit que nulle terre sans Seigneur; où il y a vne chaisne de tant de puissances subordonnées les vnes aux autres. Mais en l'Eglise qui est regie en forme d'estat Monarchique, par vn chef visible, en vne hierarchie, en vne milice spirituelle si bien rangée, où les noms de Prieur, de Superieur, & d'Abbé, portent les relations de toute sorte de soumission, de filiation, & d'obedience: où l'on presche si hautement & si veritablement que toute puissance vient d'enhaut, & que quiconque resiste aux puissances establies, il resiste à l'ordonnance de Dieu: de voir la des-obeissance & la contumace des Chanoines & des Moines d'aujourd'huy enuers leurs Superieurs, c'est ce qui est digne de la compassion publique. Que si l'Abbé de saint Martial estoit dans la condition commune des autres Superieurs qui ont des sujets discoles & des-obeissans, il cederait au temps, & n'entreprendroit pas de corriger vn vice qui est presque tourné en mœurs & en coustume, & qui par consequent est au rang des choses incurables & sans remede: mais il est reduit à tel point, qu'au lieu qu'il deuroit discipliner & gouuerner ses Chanoines, ou au moins en cas de repugnance, les poursuiure pardeuant leurs Superieurs communs en la iustice Ecclesiastique ou seculiere, il est enfermé dans vne honteuse & iniuste prison dans la ville de Limoges, d'où à peine, & par la faueur d'un Geolier qui n'a pas esté gratuite, il a fait sortir ceste plainte, par laquelle, veul'extreme & inusitée oppression qui luy est faite, il proteste de ne pardonner au nom de pas vn de ceux qu'il sçaura auoir contribué à ceste iniustice.

Le defunct Euesque de Limoges est le premier qui par vne contention de titres & de dignitez a trauaillé l'Abbé de saint Martial, à cause de l'exemption que luy & ses Chanoines sont fondez d'auoir contre Messieurs les Euesques de Limoges: Exemption qui n'est pas vn grand passedroit, puisque toute la France, & presque toute la Chrestienté fournissent des exemples de semblables priuileges; si luy a de l'inconuenient & de l'abus, ce n'est pas à present la question, ny le temps d'y mettre ordre; c'est l'ouurage de quelque Concile pour les siecles d'auenir. Tant y a que l'Euesque de Limo-



ges prenant ceste competence à cœur au delà de l'intereſt commun de l'Egliſe, & en faiſant vne querelle particuliere, il excita contre l'Abbé de ſainct Martial ſes propres Chanoines, qui de Moines qu'ils eſtoient, ont eſté ſeculariſez depuis quelques années. Entr'autres les nommez Iean de la Brouſſe Preuoſt de l'Egliſe de ſainct Martial, & vn nommé Deſmaisons furent les premiers qui ſ'offrirent & ſe déuouèrent à la perſecution de leur Abbé, & ſe déclarerent contre luy dès l'année 1607. Leur coup d'eſſay ne fut pas moindre que de prendre ledit ſieur Abbé à la gorge, & luy preſenter le poignard luy eſtant lors aſſis dans ſa chaire Abbatiale en ſes habits Pontificaux, au milieu de ſon Egliſe. Ceſte impiété eſt horrible, & ne doit, ce ſemble, trouuer de creance que dans l'eſprit de ceux qui ſont capables de la commettre: Elle eſt veritable néantmoins, & toute la Guyenne en a eſté abbreuüée & ſcandalifée par l'information qui en fut faite de l'ordonnance du Parlement de Bordeaux, laquelle neantmoins ne fut pas pourſuiuie par la debonnaireté & l'indulgence de l'Abbé, qui voulut oublier ceſte iniure, pour reduire ces gens-cy à leur deuoir; mais leur naturel farouche ne pouuant receuoir ny loy ny diſcipline, & l'accouſtumanee de leurs crimes les ayant abbrutis à l'eſgal des mulets & des beſtes qui n'ont plus de raiſon, ainſi que parle le Pſalmiſte, ils continuerent leur mal-talent à l'endroit de leur Abbé; & pour ſe tenir en haleine & en appetit de luy mal faire depuis ce premier attentat, qui eſt de ſix cens & ſept, ils ont touſiours pourſuiuy contre luy quantité de procès ciuils, qu'ils ont aſſaiſonnez de tous les ingrediens de fiel & d'amertume, qui ont couſtume d'entrer en telles faſcheuſes compositions.

Le ſixieſme de Ianuier dernier, iour des Rois, iour de recreation pour les honneſtes gens, mais iour d'abandonnement & de fureur pour les deſeſperez & les yurongnes, leur meſchanceté ſ'eſtant enflammée par leur deſbauche, ils ſ'eſchapperent le lendemain à vne inſolence qui fut telle, qu'au milieu de la grande Meſſe, au periode des plus hautes ceremonies, qui doiuent emplir les hommes & les Anges de reſpect, d'eſtonnement & de frayeur, où l'E-



5  
glise faict la memoire du sacré moment auquel Iesus Christ se  
communiant soy-mesme avec ses Apostres, il leur recommanda  
la paix & la charité. Ces sacrileges firent que le Soufdiacre, qui de  
coustume deuoit offrir la Paix à baiser au sieur Abbé de Sainct  
Martial, ainsi qu'il se pratique par tout ailleurs, la luy refusa avec  
mespris & contumelie, alleguant que la Brouffe, l'un desdits Cha-  
noines, luy auoit defendu: pour raison dequoy, apres la ceremo-  
nie faicte, ledit sieur Abbé vsant de son droict, & de la puissance  
qu'il a sur tous ses Chanoines & Chantres, il fit emprisonner ledit  
Soufdiacre dans les prisons de sa Iustice. Ce que ces Chanoines  
reuoltez prenans pour vne iniure, au lieu de recognoistre que  
cestoit vn acte de iustice & de iurisdiction, ils se pourueurent  
pardeuant les Presidiaux de Limoges, quoy que par Arrest du  
Parlement de Bordeaux ils eussent esté interdits de cognoistre  
des causes dudit Abbé & Chanoines, à cause de leurs parentez &  
animositez, & que la cognoissance de leurs differens fust attribuée  
au Iuge de Tullés: Que d'ailleurs il s'agist de la discipline Ecclesia-  
stique où le Iuge seculier ne se deuoit point immiscer. Ce neant-  
moins lesdits Presidiaux, qui sont tous parens de ces Chanoines à  
l'exception d'un seul, prononcerent qu'ils prenoient les Chanoi-  
nes en leur protection, & que celui qui auoit esté emprisonné,  
seroit transferé en leurs prisons, dont ledit sieur Abbé interietta  
appel, qu'il qualifia comme d'abus, & comme de Iuge incompé-  
tant, auquel il n'y a difficulté quelconque qu'ils deuoient deferer.  
Cependant, & le lendemain huietiesme de Ianuier, comme ledit  
sieur Abbé assistoit à la grande Messe à son accoustumée, estant  
dans la place, & en l'habit de sa prelatrice, encore sur le point  
qu'un autre Soufdiacre presentoit la Paix audit sieur Abbé, ledit  
la Brouffe, par vn sacrilege, qui ne peut estre expié que par vn  
gibet, comme s'il eust pris plaisir à butter le propre Fils de Dieu,  
qui ne recommande rien tant à ses Disciples que la paix & la dile-  
ction, il se leue scandaleusement de sa place, arrache la Paix des  
mains du Chanoine qui la presentoit à l'Abbé, & crie tumultuai-  
rement que son Abbé ne meritoit pas qu'on luy donnast la paix.



La Messe estant finie, comme l'Abbé sort du chœur, en la compagnie du Prestre qui venoit d'officier, ayant ses habits sacerdotaux, & ledit Abbé pareillement reuestu de son roquet & de son camail, cet autre desesperé, nommé Desmaisons, se ioignant avec la Brouffe le Iudas & le coryphée de la troupe, qu'ils auoient disposée dans la nef à l'entrée du chœur, voicy que d'une mesme fureur, avec vne salue d'iniures & de blasphemes, ils se iettent sur leur Abbé, les freres duquel & ses valets festans mis en deuoir de le defendre, ils furent accueillis de coups d'espées, & dans ce conflict l'un desdits valets, en vne si iuste defense, ayant effleuré legèrement l'un desdits assassins, les autres le traisterent de voye de fait par deuant les Presidiaux, qui estoient lors au Siege, & publierent impudemment à la face des Iuges, que l'Abbé de Saint Martial, son maistre, auoit tué quatre Chanoines roides morts au milieu de son Eglise. Et sur ceste imposture, qui pouuoit estre sur le champ conuaincuë, les Iuges Presidiaux, dont la pluspart estoient complices de ceste coniuration, enuoyerent le valet prisonnier, decreterent prise de corps contre l'Abbé de Saint Martial. Il est contraint sur l'aduis qu'il en eut de se retirer de la ville; sa maison est forcée & mise en proye, comme si l'eust esté l'ennemy coniuré de la patrie.

Cependant, & tandis qu'il se pouruoit au Parlement de Bordeaux, de l'ordonnance duquel il fist informer de tous ces outrages, la Brouffe & les autres coniurez tournent les yeux de tous costez pour se mettre en vne puissante protection; mais ils n'en trouuent point en France, ils la vont rechercher en Sauoye, & se iettent entre les bras du sieur Brisacier, l'un des commis de Monsieur Desfiat. Le premier acte que fit ce preud'homme, pour leur tesmoigner qu'il les vouloit prendre en sa sauuegarde, ce fut d'establiir vne qualité; & pour cet effet, par la facilité que les bons Princes donnent à leurs subjects de les oser aborder, il ne manqua pas de représenter au Roy que l'Abbé de Saint Martial de Limoges auoit tué quatre Chanoines au milieu de son Eglise, qu'il estoit tombé en irregularité, & que son benefice estoit vacant *ipso iure*,



supplioit sa Majesté de l'en gratifier. Il n'est pas de besoin icy de rechercher quels artifices, & quelles machines il remua pour paruenir à son intention, tant y a qu'il en obtint breuet pour vn de ses enfans; sil en a les merites & les capacitez, c'est vne autre question. En mesme temps on expose au Conseil du Roy qu'il y auoit conflict de iurisdiction entre le grand Conseil, le Parlement de Bordeaux, & les Presidiaux de Limoges pour raison de ce grand meurtre. Interuient Arrest sur requeste, sans ouyr ny appeler ce pauvre Abbé, par lequel il est dit, que les informations contre luy faiçtes par les Presidiaux de Limoges seront continuées par le premier Maistre des Requestes, ils sçauoient bien où le trouuer. La commission est adressée à Monsieur d'Argenson Intendant de la Iustice en Limosin.

En cet endroit l'Abbé de Saint Martial est contraint de dire hautement, que pendant la persecution des siecles passez il sest veu des Prelats estre mal traitez, & souffrir des peines plus cruelles & plus aigues que n'ont pas esté les siennes: mais c'estoit sous des Nerons, sous des Attilas & des Alarics, par des Gots & des Vandales; & de nos iours par des Lutheriens & des Lansquenets: Mais que sous vn regne si pieux, sous vne domination si iuste, comme est la nostre, dans vne ville Catholique, vn Prelat innocent aye esté traicté de la sorte par des officiers de Iustice, & sous le tiltre de Iustice, c'est ce qui n'est encores arriué qu'au seul Abbé de Saint Martial. Le sieur d'Argenson auoit sa leçon par escrit, sa commission luy donnoit pouuoir de faire le procez aux coupables sur l'acte commis dans l'Eglise de Saint Martial: l'ordonnance (si toutefois on la peut alleguer contre vne insolente faueur) luy enioignoit d'informer tant à charge qu'à descharge, pour trouuer la pure & simple verité. Il sembloit y estre assez disposé du commencement, en ce qu'il ordonna que toutes les charges seroient apportées par deuers luy, tant celles faites par les Presidiaux de Limoges, que celles qui furent faites de l'ordonnance du Parlement de Bordeaux, & ce dans le quinziesme de May. Mais les bons Chanoines ne se hasterent pas d'y satisfaire, parce qu'ils atten-



doient homme & instructions de la part de Brisacier, ils auoient ainsi aiusté leurs mesures. Tellement que Monsieur le Commissaire ne fessant exhibé à Limoges sinon le 28. de Iuin, l'Abbé de Saint Martial fut incontinent à sa porte pour luy rendre conte de ses actions. Le Commissaire ne l'interroge point, bien au contraire il le traite de ciuiletez & de complimens, luy declare qu'il n'auoir point encores d'informations entre ses mains, & que lors qu'il les auroit veües il l'en feroit aduertir, cependant qu'il se retirast en sa maison. Mais comme l'Abbé sortoit du logis de Monsieur d'Argenson en la compagnie de ses freres & de quelques honnestes gens qui l'assistoient, il fut soudainement abordé par le Preuost des Mareschaux & par vingt Archers escortez des valets & de la famille de tous ces mauuais Prestres, au milieu desquels l'Enuoyé de Brisacier, visage nouveau & incogneu dans la Province, se fit recognoistre neantmoins & se fit sentir pour le fauteur & fidejussieur de tous ces scandales & outrages. Ce fut cet infame, car il faut estre infame de cent races, & auoir essuyé cinquante piloris pour se prostituer à de si sordides & si iniustes ministeres. Ce fut cet infame qui le premier tordant le col au sieur Abbé de Saint Martial, & prestant ses mains impures & sacrileges à la rage des Chanoines & à la simonie de Brisacier, encouragea les Archers, qui en auoient eux-mesmes conscience, de le traduire honteusement par tous les carrefours de la ville de Limoges, à la veüe de tout le peuple, & l'enfermer en fin dans la prison où il est encores.

Il est sans doute que quiconque entendra le recit d'une si estrange procedure exercée en la personne d'un Prelat de qualité, dans la ville où il a vescu avec honneur, où il a presché avec reputation, s'imaginera d'abord qu'il doit estre coupable de quelque grand forfait, quelque meurtre de guet à pens, quelque force-lerie ou abomination, quelque conspiration contre le Roy & la patrie: Et neantmoins ny la corruption des Agens de Brisacier, ny les ingenieuses meschancetez des Chanoines ne l'ont encores sceu charger d'aucune faute considerable & approchante de crime.

Car



Car quant à ces quatre Chanoines qu'il auoit tuez, & le sang desquels auoit iaillly iusques aux voutes de l'Eglise, ils viuent encores, & viuent avec plus d'intention que iamais, non pas de se corriger, mais d'augmenter leurs insolences & leurs scandales, & en esperance de fondre quelque iour les reliques de leur Abbaye, fils sont si heureux que d'auoir pour Abbé le fils d'un Commis de finance, qui leur fournira d'instructions & d'adresse pour vendre en toute liberté de conscience le patrimoine sacré de l'Eglise.

Mais neantmoins afin que le sieur d'Argenson ne demeurast pas inutile, & *ne pulchrum se ac beatum putaret*, ainsi que parloit Ciceron du Preteur Romain, sous le respect toutefois qui luy estoit deub, ledit sieur d'Argenson a ouy quantité de tesmoins tous emissaires & confidens de ces bons Chanoines. Le sommaire de leurs depositions aboutit, à ce qu'ils ont chargé l'Abbé Commandataire de saint Martial de Limoges d'auoir permis pendant le Carnauval dernier, qu'un Balet aye esté dansé dans sa maison à la veuë de plusieurs honnestes gens auxquels il auoit donné à souper : Crime nouveau (ce disent-ils) & iusques à nos iours inoüy, & inusité. Ils rechargent, & disent qu'en ceste celebrite ou en quelque autre rencontre il y eust des impietez & des profanations commises, & que le Dieu Bachus y fut inuoqué. De semblables inepties (car ils s'en sont vantez eux mesmes) sont pleines & farcies toutes ces informations : A quelle quantité de roolles elles peuuent monter, c'est ce qui viendra puis apres en taxe de frais & de salaires. De sçauoir si les tesmoins persisteront au recollement & à la confrontation, il y a grande apparence : car ils n'auroient pas auancé des accusations si capitales & si enormes, s'ils n'auient assez de constance pour les maintenir. C'est cependant sous ces pretextes & pour l'expiation de ces grandes fautes, qu'un Abbé de douze mil liures de rente, un homme d'honneur, un homme de cinquante ans a esté fait prisonnier à la requeste & à l'instigation de ses Chanoines.

Or cessant la passion des Presidiaux de Limoges, qui sont tous parens desdits Chanoines desbauchez : Que ceste affaire soit por-



téc pardeuant tous les tribunaux du monde, à les prendre depuis la censure & le premier degré de iurisdiction des peres de famille les plus seueres, iusques aux Parlemens & souuerains Consistoires: il ne sera iamais dit que pour des suiets si friuoles on aye deu faire des procedures si violentes & si precipitées, & qu'il faille qu'un homme, fut-il de la lie du peuple, trempe dans vne prison pour auoir entendu chanter, peut estre mesme avec dégoust & importunité, l'ouurage d'un meschant Poëte par quelque fantafque & ridicule Musicien. Et certes s'il estoit deuant des Iuges equitables, ou s'il n'estoit point dans vne prison suspecte, il se mocqueroit luy mesmes de l'impertinence de ses accusations, tant s'en faut qu'elles luy fissent de la peine ou de la honte. Autrefois le grand Ronfard, l'honneur de la France, les delices de trois ou quatre Roys, le miracle de son siecle, s'estant rencontré au village d'Hercueil en la compagnie de ces autres grands hommes de son temps, par vne boutade poëtique ils se couurirent de pampre & de lierre, & sacrifierent vn bouc à Iodelle avec tout l'appareil & le mystere des anciens sacrifices: Deux maraux de Ministres, Moines défroquez & apostats (car il n'y en auoit point d'autres alors) en firent vn cas de conscience, & s'accouplans ensemble ils bastirent contre luy vne aussi fade satyre, cōme leur zele estoit fort & dissimulé, non pour autre suiet sinon que parce que ce grand homme auantageux qu'il estoit en stile & en science, auoit armé les Muses au secours de l'Eglise contre l'impieté & la faction nouuelle, & qu'il scauoit le secret de tous ces faux Predicans. Qu'en fut-il autre chose, sinon que ces pauures Casuistes excitèrent contr'eux l'indignation & la risée de tout le monde. Ronfard ne laissa pas d'estre honoré par le Pape & par le Roy, de plusieurs grands eloges, & plusieurs grands benefices: tous les gens de bien s'armerent pour sa querelle, & luy mesme en sa qualité de Prelat & d'Abbé, dans ceste excellente inuectiue qu'il nous a laissée, traina avec son estolle & sa ceinture sacerdotale ces deux malheureux, qu'il fit heurler comme des enragez & des demoniacles; digne supplice de la fanatique superstition de ces deux rene-



gats qui imputoient à blasme à ce grand homme de s'estre resioüy avec les amis, & d'auoir imité les sacrifices de Bachus. Voila cependant tout le crime de l'Abbé de saint Martial, & pour lequel il est confiné dans vne obscure & iniuste prison. Car quant aux hommes assassinez dans l'Eglise, c'est vne feinte, c'est vne imposture & vne fureur, c'est vne imagination d'yurognes, offusquez de vin & de petun, & des propres troubles de leur conscience, & le temps a trop esclaircy ceste verité depuis & dés l'instant mesme de ceste fausse alarme. Que si on considere la qualité des parties, qui est tousiours la premiere circonstance des matieres criminelles, on verra vn Superieur que ses suiets accusent & emprisonnent de voye de fait : & de verité il faut necessairement qu'ils auoient que c'est par vne voye de fait & de force, car n'en desplaie aux Presidiaux de Limoges, & à Monsieur le Maistre des Requestes, telles procedures sont directement contraires à la dispositiō ciuile & canonique. Le nom d'Abbé signifie vn pere en la langue Sainte, & au sens de l'Eglise; & par consequent ses Moines & Chanoines de quelque nom qu'ils se qualifient, ils ont enuers luy la relation & la qualité d'enfans. Or que dit le droit Romain? vne sentence qui est bien courte: mais qui estoit aussi certaine parmy eux, & autant inuiolable, comme le doit estre parmy nous la loy Salique; aussi estoit-ce la loy fondamētale de leur estat. Point de procez (dit ceste loy) entre le pere & l'enfant: au pere, droit de vie & de mort sur sa creature: à l'enfant, toute sorte de soumission enuers son pere, & la gloire de la seule obeissance. La disposition des saints Decrets n'est pas plus fauorable pour ces mauuais Chanoines, ains elle est-seule capable de les confondre aussi bien que les Iuges qui s'en sont meslez. Qu'ils lisent, s'il leur plaist, la distinction 99. qu'ils courent de l'œil la question 7. de la cause seconde, & ils apprendront par la suite de toutes les constitutions de l'Eglise, & depuis le Pape Euariste, qui fut le cinquiesme apres saint Pierre, que regulierement & par vne maxime de laquelle on ne s'est iamais departy, il ne fut iamais loisible à des inferieurs d'accuser leurs Prelats & Superieurs; que si quel-



quefois, & pour la vie scandaleuse des Pasteurs, telles accusations ( ce qui se trouuera tousiours fort rare ) ont esté receuës, ç'a esté apres que les accusateurs ont esté recogneus aussi purs & aussi exempts de passions, comme les Anges & les astres le sont des troubles de la terre. Mais quels sont les Chanoines auxquels l'Abbé de saint Martial a maintenant affaire ? Qu'on lise leurs propres informations, car quelque subornation & quelque desguisement qu'ils y ayent peu apporter, on verra que ce sont des hommes desesperés, l'opprobre & le scandale de leur Ordre, des sacrileges disciples, lesquels au baiser de paix & pendant le sacrifice de reconciliation trahissent & deshonnorent leur maistre. Que reste-il plus sinon qu'en ceste iniustice publique qui se commet à Limoges, ils se la fassent à eux mesmes, pour acheuer la ressemblance du premier qui trahit son maistre par vn baiser de paix ?

Mais apres tout, à quelle fin est-ce que ces Chanoines veulent degrader leur Superieur ? pour qui est-ce que l'on conteste & que l'on debat si asprement la chappe de ce pauvre Abbé ? est-ce point peut estre pour la partager entr'eux ? mais ne seroit-ce pas dommage de diuiser ceste belle manse Abbatiale capable d'entretenir vn homme de merite pour la partir & abandonner à des frippons ? Ou bien ne diront-ils point par ensemble, comme faisoient les autres, *Non scindamus eam, sed sortiamur de illa cuius sit* ? Sans doute qu'ils en auroient assez d'enuie s'ils estoient assez considerables pour y pouuoir paruenir : mais ils ont mieux aymé deferer ce present à vne personne puissante. O sages mondains ! ô personnages d'une grande & genereuse ambition ! Volontiers qu'ils se sont adressez à quelque Prince, à quelque Cardinal, à vn Gouverneur de Prouince, à vn Marechal de France, à quelque puissant College Ecclesiastique ? Rien moins que tout cela. Ils sont allez à la suite de la Cour dispersée lors dans les montagnes de Dauphiné & de Sauoye, & parce qu'ils vouloient vendre, non pas l'Abbaye ( car ce seroit vne simonie, & ils ont trop de conscience ) mais bien leur droit d'aduis, qui est vne marchandise permise : ils s'adressent iustement au sieur Brilacier,



l'un des Commis du tiers ordre de Monsieur le Surintendant, le nom duquel n'est point icy allegué pour estre tiré en enuie, & en occasion de terreur, puis que luy mesme il a grand interest, comme tous les autres grands Seigneurs, que ses supposts n'abusent point de son autorité. Tant y a que ce Brisacier eust assez d'effronterie pour entendre à la proposition de ceux qui luy vindrent mettre ce marché à la main, & sceut si bien prendre le point de l'occasion, principalement en ceste multitude d'affaires où le Roy est maintenant occupé, que sous le faux donné à entendre de la vacance du Benefice, sous le desguisement de la valeur d'iceluy, sa Maieité luy en fit expedier vn breuet. *Hinc illæ lachrymæ.* De là la commission pour informer enuoyée au Maistre des Requestes, de là son iniuste & animeuse procedure, de là l'insolente & scandaleuse traduction de l'Abbé de sainct Martial, de là son estroite & tyrannique prison en laquelle on ne luy donne pas seulement la permission d'ouïr la Messe les iours de Dimanche & des Festes. Cecy n'est pas vne amplification & vne histoire contrefaite: car lors qu'il y aura des Iuges establis pour cognoistre de ceste affaire, l'Abbé de S. Martial espere d'en rapporter les preuues, & n'y a qu'une mort precipitée qui l'en puisse empêcher.

Or iusques icy ledit sieur Abbé auoit pensé de dissimuler vne des principales circonstances de sa cause, mais en l'oppression qu'il souffre, il preuariqueroit contre luy mesme s'il oublioit à la releuer: C'est en vn mot qu'en vne affaire de ceste qualité, où il ne s'agist que de Prestres & de Diacres, de Religion pollüe, de Sacrifices interrompus, bref, en vne matiere pure Ecclesiastique, Monsieur le Commissaire a appellé avec luy vn adioint de la Religion pretenduë reformée pour entrer en cognoissance de tous ces scandales. Dieu sçait si en vne si precipitée & si confuse procedure ils ont faiët d'estranges démarches, & de quelle foy les tesmoins de ceste information ont rendu leurs tesmoignages, quand ils ont veu les Iuges ainsi disposez. Cependant l'innocent patit au fonds d'une iniuste prison, car c'est bien vne in-



injuste prison, puis que c'est celle des Presidiaux de Limoges qui estoient interdits par le Parlement de Bordeaux; Interdiction qui n'est pas encores leuée, de sorte que le decret estoit notoirement nul. Mais ils se sont imaginez que plus leur vexation seroit grande, & plustost ils contraindroient l'Abbé de saint Martial de composer de son Abbaye pour racheter sa liberté & sa vie des embusches qu'ils luy peuuent dresser tous les iours. Que si quelque souveraine puissance ne tend la main à ce pauvre affligé pour le tirer de ceste abyssme d'infortune, outre qu'il n'est pas en seureté de sa personne, il faudra qu'il attende pour obtenir son esslargissement en cognoissance de cause, que le Roy aye conquis ou pacifié toute l'Italie, tandis que Brisacier avec ces deux Chanoines triompheront de sa misere, & disputeront entre eux les conditions de leurs concordats.

Ce sont les raisons, Messieurs, qui ont fait que ce pauvre Prelat, apres avoir tenté tous les moyens legitimes pour se tirer de cet iniuste emprisonnement, apres avoir presté son interrogatoire pardeuant le sieur d'Argenson Intendant de Iustice, & Commissaire en ceste partie, apres luy avoir présenté plusieurs requestes afin d'esslargissement, & offert pour cent mille escus de cautions, en vne affaire de ceste qualité, entre telles parties, & où la charge ne va qu'à la representation d'un Balet, & de quelque autre mome-rie qui a esté faite en sa maison. En fin, Messieurs, ces raisons ont fait que ne pouuant pas avoir la liberté de sa personne, il adresse deuers vous les soupirs de son ame oppressée. Il vous supplie par les saincts caracteres qu'il a l'honneur de porter, & par la communion de paix & de charité que Iesus-Christ vous a si precisément recommandée, que vous ayez pitié de ses larmes, & que vous soulagiez son esprit des apprehensions d'un empoisonnement, ou de quelque autre malefice qui luy pend sur le chef: Qu'ayant l'honneur d'estre vn des membres de vostre illustre corps, & qui n'a pas esté tousiours des plus inutiles, vous luy communiquez l'influence de cet esprit de charité & de dilection, qui



doit regner parmy vous, & que Iesus-Christ vous a laissé particulierement pour le preciput de vostre partage. Il vous a recommandé par ensemble vne si intime & si estroite vnion quil vous en a marqué le modele sur la comparaisson de luy-mesme avec Dieu son Pere. Ioignez-vous, Messieurs, en ceste cause commune, ne souffrez pas que l'interest d'un petit compagnon de finance, qui fait peut-estre bouclier du nom de son maistre, vous diuise & vous des-vnisse, en sorte que vous abandonniez vostre pauvre frere & seruiteur. Que si, Messieurs, vous n'avez pas assez de credit pour obtenir quil soit rendu à tels Prelats quil plaira à sa Sainteté de deleguer, pour iuger de sa vie & de ses actions. Et que le Roy tres-pieux & Tres-chrestien ait esté tellement preuenü des ennemis dudit sieur Abbé, qu'on aye fait croire à sa Majesté que la qualité des crimes pretendus requiere l'autorité & la puissance du bras seculier: Il vous supplie, Messieurs, de ne vous pas opiniastrer pour la conseruation de vos priuileges; volontiers il subira pardeuant telle iustice reglée quil plaira au Roy de luy ordonner. Il y a huit Parlemens en France, il en donne le choix à Brisacier, il n'en refuse pas vn. Celuy de Bordeaux leur sera peut-estre suspect, parce que ces Chanoines y sont cogneus, notez & descrivez, parce quil y a des parens, parce que Monsieur le Gouverneur le cognoist, parce quil a presché & paru dans la prouince. Et bien, Messieurs, il ne l'affecte pas, par tout où il trouuera de la iustice, il y trouuera sa iustification. Mais quil demeure plus long temps à la mercy du sieur d'Argenson & de son adjoind Huguenot, en la prison de Limoges, en la possession de ses parties, à la foy de leurs consciences pourries, cest ce qui l'impatiente & le trauaille; cest ce qui luy donne la hardiesse de vous appeller à son aide, & à sa deliurance. Quoy, Messieurs, apprehendez-vous? n'y estes vous point esmeus par les entrailles de la misericorde de Iesus-Christ? vous y faut-il inuiter par l'interest de vos personnes? Messieurs, vous y estes extrêmement interesséz; ceste cause, encore vn coup, vous est commune avec l'Abbé de saint Martial; ne l'ayez-pas, sil vous plaist, en auersion: Il nest pas pollü ny excommunié; ne



craignez pas d'estre profanez par sa contagion. Ouy, Messieurs, il ose le prononcer hautement, & du mesme accent qu'il a presché au milieu de la Guyenne; & quoy qu'il soit parmy les fers & les manottes, *verbum Domini non est alligatum*. Il le dit, Messieurs, hardiment: Si pour tenir vne maison honorable, si pour auoir fait bonne chere aux honnestes gens qui le sont venus visiter chez luy, il est criminel & irregulier: Messieurs, à l'exception de quelques Prelats d'une extraordinaire austerité vous estes tous coupables tant que vous estes qui vivez honorablement selon la dignité de vos extractions & la splendeur de vos prelatures. Pardonnez, s'il vous plaist, à ceste comparaisson par laquelle il n'entend pas entrer en contestation & en competence des autres grandes qualitez que vous auez par dessus luy: Mais il le dit afin de vous exciter par toutes sortes de raisons & d'interests legitimes, de prendre sa cause en main, & d'interceder pour luy enuers sa Majesté, à ce qu'il soit promptement eslargy des prisons où il est detenu & tourmenté, pour en vne iustice libre & legitime, sans faueur comme sans supercherie, se purger de tous les crimes pretendus qu'on luy impute, & nettoyer iusques aux moindres taches de sa reputation, à la satisfaction de vostre Ordre tres-illustre, à celle de sa famille, & de sa conscience.

